

光緒永城縣志卷十七

人物志

仕蹟

唐

朱敬則仁軌之弟好學重氣節累官同鳳閣鸞臺平章事每以用人爲先務以直忤時出爲鄭州刺史與三從昆弟同居四十年貲產無異事詳唐書

鄭惟忠永城人天授中以制舉召見武后問人臣何忠曰外揚君之美內正君之惡后曰善遷鳳閣舍人中宗立擢黃門侍郎時禁嶺內曾戶不得畜兵惟忠曰善爲政

者因其俗吳人所謂家鶴膝戶犀渠此民風也禁之得毋擾乎乃止授御史大夫持節賑河北還封滎陽縣男
造太子賓客卒贈太子少保

唐書

宋

曹彬字國華其先真定靈壽人從太祖官徙居永城父芸

五代仕漢成德軍兵馬使彬乾祐庚戌爲成德牙將宋

乾德初爲西上閤門使使吳越遷左神武將軍兼樞密

承旨平蜀歸篋中惟圖書數卷開寶六年進檢校太傅

七年帥師伐江南八年克之不妄殺一人上曰卿不矜

伐真使相也賜錢五十萬未幾拜樞密使太宗時從征

太原進同平章事封魯國公咸平二年被疾上親幸問
仍賜白金萬兩堯年六十九真宗臨哭之贈中書令封
濟陽郡王謚武惠配享太祖廟爲時良將第一祀鄉賢

舊志

曹瑋彬之子生而英勇絕倫沉毅有謀幼從父軍中多立
戰功趙元昊方十歲言市馬公卽識其人後日必爲邊
患自少捍禦西郵善撫士卒殺懷邊人熟知羌情每以
奇計用兵所向克捷嘗集兵三千於堂外寂無人馬聲
又嘗不動聲色殄暴寇於樽俎之間蓋其馭軍嚴肅如
此父彬寢疾真宗幸其第問以後事對曰臣無可言臣

子瑑瑋材器可取皆堪爲將然瑑不如瑋帝遂循次擢
用累官安撫觀察使天禧間改彰武軍節度使兼樞密
院事卒諡武穆嘉祐八年配享仁宗廟廷

舊志

石延年字曼卿本幽州人幽州入於契丹其祖自成移家
永城父諱補之官至太常博士延年少以氣自豪讀書
不治章句獨慕古人奇節偉行視世俗屑屑無足動其
意者自顧不合於時乃一混以酒由是益與時不合人
之從其遊者皆知曼卿落落可奇而不知其才實堪
大用也少舉進士不中真宗推恩三舉進士皆補奉職
延年初不就張文節公素奇之謂曰母老乃擇祿耶延

年慶然就之遷殿直改太常寺太祝知濟州金鄉縣嘆
曰此亦可以爲政也在縣有治聲通判乾甯軍丁母李
氏憂服除復判永靜軍皆有能名充館閣校勘累遷大
理寺丞通判海州還爲校理太后臨朝延年上書請還
政太后崩范諷以言見幸欲引延年固止之自契丹通
中國德明盡有河南一時內外弛武延年上書言十事
不報元昊反稍用其說籍河北河東陝西之民得鄉兵
數十萬延年奉使籍兵河東還稱旨賜緋衣銀魚朝廷
方思盡其才而延年病旣而聞有欲以鄉兵扞賊者乃
曰此得吾粗也夫不教之兵勇怯相雜若怯者見敵縮

動則勇者亦率而潰矣今若不暇教不若募其勇者則
人人皆勝兵也其視世事蔑若不足爲及聽其施設之
方雖精思深慮不能過也康定二年二月四日以太子
中允秘閣校理卒年四十八延年狀貌偉然喜酒自豪
若不可繩以法度退而質其平生大節無一悖於理者
遇人無賢愚皆盡忻歡及問其可否善惡當其意者無
幾爲文章勁健稱其意氣子濟茲天子聞其卒官其一
子葬於太清之先塋其友歐陽修表其墓祀鄉賢

按宋史本

傳宋州宋城人宋城乃商邱非永城也並記之贊註

趙瞻字大觀永城人父剛太子賓客瞻登進士第初歷州

縣有惠政治平初自都官員外郎除侍御史上疏曰英
斷獨裁人主至權也英宗稱善時議追崇濮王瞻引漢
師董宏事力爭與傅堯俞使契丹及還聞呂誨等以諫
濮議罷乞與同貶通判汾州累遷開封府判官神宗問
卿知青苗法善乎對曰不知初王安石欲瞻助已使其
黨餌以御史瞻不應由是出陝西轉運副使哲宗立擢
至樞密直學士同知院事初元豐中河決小吳都水王
令圖請還河故道瞻固爭之卒罷役瞻又奏廢渠陽軍
紓荆河之力乞詔諭西夏使歸永樂遺民夏人聽命卒

年七十二

謚懿簡子四孝謹獻誠
彥詒一卒宋史本傳

劉顯祖字興宗聰敏博學富而好禮登進士第官至刑部

主政致仕祀鄉賢

舊志

朱禹錫係敬則先生之元孫咸平二年學究登科官虞部

員外郎

宋錢易南
部新書

張整字成伯亳州鄆陽人初隸皇城司御龍籍補供奉官
爲利文州都巡檢使邊夷歲抄內地吏懼罪返遺之物
留久乃去整惡其貪暴無已密募死士待其來掩擊幾
盡神宗壯之調荆湖將領拓溪蠻地築九城董兵鎮守
又被蠻于大田歲中三遷狃於萬眾乘舟屯托口廼黔
江城守兵纔五百人情大恐整伏其半於托口旁戒

日俟吾旦度金斗崖舉幟則諫而前及旦率其半縛艤衝掩旗鼓沂流急趨賊望見大笑幟舉杖發前後合擊人殊死鬪蠻騰踐投江中殺獲不可計升廣西鈐轄坐殺降徭責監江州酒稅復爲涇原真定京東還慶鈐轄整涖軍嚴整哲宗嘗訪於輔臣召之入對擢龍神衛四廂都指揮使管幹馬軍司領威州刺史卒

宋史庶官傳

陳從信字思齊亳州永城人素性恭謹精心計事晉邸官累右知客押衙合典王宮財用事無大小悉以諮焉開寶三年三司言倉儲月給止及明年二月請分屯諸軍盡率民船以資江淮漕運太祖大怒三司使楚昭輔懼

詣晉府求寬王召從信問計對曰從信嘗遊楚泗隸
運之患良由舟人廩食日厯郡縣勘給是以遲滯若計
往復日期併與支給可以責其程限又楚泗運米至京
復輦入倉宜宿備運卒卽時出納如此每運可減數十
日舊制一歲三運若去淹留之虛日計歲可增加一運
矣今三司欲籍民舟不許則無以責辦盡許之則至冬
京師薪炭殆絕不若募舟之堅者任漕糧其損敗者載
薪炭度幾公私俱濟又市米所以騰貴者因官價賤買
人失利不至居商亦匿而不糶故米益貴宜聽民自便
卽四方奔湊者多價自賤矣明日具奏可之事果咸集

太宗卽位遷東上閣門使充樞密都承旨太平興國二年改左衛將軍征并汾充大同副部署罷明年分三司爲三授從信度支使賜浚儀寶積坊第加右衛大將軍卒年七十二贈太尉

稽顙字公實天聖中進士及第授蔡州判官遷尚書兵部員外郎召爲翰林學士賜金帶鞍馬王曾爲南京留守見其謹厚篤學謂子弟曰若曹師表也

元

陳奕字景新永城人漢戶牖侯丞相之裔也祖諱俚始大仕籍奕當度宗時掌環衛元師南犯詔以步軍都指揮

兼攝馬軍殿司事累官至濟武軍承宣使左金吾衛上將軍殿前都指揮使沿江制置知黃州徙知江陵嚴以御軍寬以撫民其守秦守真守分率皆完城壁繕器械不敢一日懈懈元師南下念先人邱隴在北地乃舉黃州屬郡降元率舟師爲先驅秘籌軍中詔赴闕疾作肩輿至燕京入覲恩數優渥賜金虎符授資善大夫沿江大都督翌日疾革卒於會同館年七十有七贈金紫光祿大夫侍中沿江大都督諡毅敏歸葬於永城故里保安鄉之先塋按舊志曾祀于鄉郡志黜之

朱貴孝友仁軌先生之後也仕元帥府經歷遷詳議官功

績廉明。

范圭鄉貢進士爲桐城教諭調密縣教諭資質端重學問

該博致仕卒

舊志

光緒永城縣志卷十八

人物志

仕蹟

明

張麒洪武中授兵馬副指揮昭勇將軍進都督同知以功封奉天翊衛宣力武臣特進榮祿大夫封彭城侯女爲燕世子妃後仁宗立册封女爲皇后以戚加封惠安伯卒子謚恭靖祀鄉賢子景襲彭城侯子昇襲惠安伯

明史

張景字仲舒麒子也少備宿衛夙夜惟謹靖難起兵連戰大捷以功授義勇中衛指揮同知襲彭城伯防禦薊州

守北平以功調府軍右衛仁宗卽位以中軍左都督封奉天翊衛宣力武臣特進榮祿大夫柱國伯子身免二死正統元年薨葬宛平壽安山之原子八人輔輅輓輓軾輟輗輅輔先卒孫璟嗣爵璟卒信嗣信卒銘嗣明史張昇字叔暉麒季子初以城守功授後府都督同知永樂三年陞羽林前衛指揮洪熙元年陞左都督宣德元年宣宗巡邊命分守北京凡朝廷大政得預議正統五年封惠安伯世襲昇爲人端重循禮閨門整肅家庭孝友教諸子有方平居簡默臨事有卓見歷事四朝忠慎勤謹遇文學士必加禮敬少留心載籍至老不倦故子孫

世守家法云卒孫琮嗣琮無子成化五年弟瑛嗣瑛無
子弟瓚嗣洪治七年偉嗣卒贈太傅子謚子綱嗣卒元
善嗣明史

曹綱係曹晟之從子成化中任大名府知事改松江府愷
悌宅心謙恭處世有古循良風

魏祝正德中任宜川縣知縣天性謹愨涖官清界祀鄉賢
劉寅字畏所隆慶初仕廣宗縣知縣居官謹慎實心愛民
有愷悌父母之稱祀鄉賢

李琛字廷寶號野亭其先晉之翼城人也賈於中州徙居
太邱公生而岐嶷八歲善屬文日誦數千言數奇不售

正德中以資貢太學甲午鄉闈汪誠齋公首拔之會逆
瑾用事公五策侃侃遂不錄乙未授北兵馬鋤奸摘伏
一時勲戚閹宦皆斂手人謂董少平包孝肅復出也督
造奉先殿成擢巴州同知首葺學宮月課諸生名士皆
爲取拔歲饑設粥賑之大疫施藥餌療之學博士卒於
官程遠不能歸公捐資以襄其事禹跡石燕玉山平梁
之間通於劔閣盜賊潛伏公清保甲戢防不虞報政後
告歸置義田以贍族人隣黨有婚喪不給者莫不賴其
周恤卒年六十有一子孫科第簪纓累世邇厥發祥公
實始焉

胡恪誠字仲孚號錦屏母嘉魚縣主內鄉王女也爲人襟
度曠逸蕭灑脫弱冠入邑庠辛酉舉於鄉謁兵憲大
司馬張公佳眉凡有問錦屏侃侃對應如懸河至談弭
盜事尤切中時弊登進士第授常州府推官獻獄明允
海剛峯瑞巡撫應天以儉質率屬公移用連七單封錦
屏用連四夾封海公怒其格令屏對以爰書多重辟又
無印關恐露墨迹以啟奸公是之一時服其勁直考最
績當拜諫垣因母嘉魚縣主例不京除陞安慶府同知
丁外艱服闋補西安職邊儲兩院以其才交委之事不
得兩先錦屏事兩院如在常州時以是得罪左遷濱州

判官署長清縣事在郡邑皆有能聲陞任邱令任邱孔道也驛遞告疲錦屏至夫馬視勘合此外一夫匹馬不加三輔御史常取所部名馬送都中知厚者錦屏雖直指索餽顯要皆不從監使者督課急商鹽告滯罪任邱多私鹽病官錦屏曰鹽一也官價倍私私土產也禁不得食而強派以商民不困於商乎願解綬去直指好語慰之尋罷冢宰曰此強項令也終不容於要路調閑散錦屏亦自是縣車矣居鄉爲人作美不平者就質盈門有陳太邱風

李楠字伯南一字中石福琛巴州同知父良知武學教授

嘉靖壬寅公生於巴州官署束髮有文名補博士弟子
員文譽日馳同舍生汝南黃凝道病疫人皆避去公曰
人苟當死何有於疫耶躬爲調攝病痊人皆義之隆慶
庚午舉於鄉萬曆丙戌成進士除松江府推官松漕白
米累及萬民公舒其困戊子己丑歲饑朝廷發數萬金
布賑公皆實給於民所拯以十萬計其佐巡也蘇常鎮
每邑大獄無慮數十公發伏推隱務求簡孚曰吾不敢
輕出一人輕出則死者含冤於地下吾不敢輕入一人
輕入則生者含冤於獄中其舞文虎冠者悉鋤之陪巡
毘陵課諸生文而以江陰繆公昌期爲首繆公終身師

事之理松七年擢浙江道監察御史首疏二事其一謂六年京察則自考功關於臺省臺省宜集同臺同省公論不宜先寄聞見於一人而後會單其二謂洮河之犯火落赤實爲戎首着力免宰僧則助哮賊絕我糧餉者莊禿賴明愛雖創靈州而逆我戎行必不可款總督計非是萬曆二十一年巡按陝西茶馬招中舊豁武弁茶篋日輕而番無實用駑貽充數而馬又無實用致以新增數多爲解遂上疏劾在事文武罷去承委卑官責成寺道定茶篋斤數著爲例番商兩便又奏寺臣棄去者五邊圍久虛乞更置兵憲以兼馬政復奏請各監增設

錄事是秋西陲入寇榆林殺遊擊擒把總公駐節靈州督府悉調靈州兵遠征公搜空城集老弱守陴七晝夜不解衣一時邊聞爲公危公怡如也劾總督平日弛防臨時失事之罪遂陳邊計安攘善後八事值選讀中秘奏中原四科散館不得一人乞每省均舉詔可其議秋乞假還二十六年補湖廣道監察御史巡按浙江兩浙礦稅橫厲諸棍張宗仁等則奏市舶魚課歲可得四萬兩高時夏等則奏餘鹽退引可得三十萬兩王心澤等則奏改布黃生絹內官督造每十萬季得羨餘五千兩又奏廢寺田產變價可得三十餘萬兩又奏衢州官山

可採金礦大木可採變價何其賢等則奏查勘積餘無礙歲額會銀詔令稅監劉成高案會司進解公疏反覆辨晰持其不可時一監司開採一監司督稅公疏請歸併一人既留鹽課二萬八千餘兩又留闕稅六千兩公力爭以免明年復命中途心動亟具章請省親馳歸七日而武學公歿服除復補湖廣道巡視京營考選軍政兼掌河南道印務時戎政位虛公奏請協理重臣不宜僅遣內官天變公奏聖諭誓修實政不宜如往年故事中官誣奏王大義等盜伐皇陵樹木詔令會勘公同諸臣由瓦磴溝懸詭跑兒登火石嶺至石墻口還言李浚

所奏椿楹乃先年二十八年馮大榮舊砍俱在其中諸
陵且在百里之外無贓証可坐大義等無罪奉命巡按
順天時各項稅銀已奉旨歸併有司奏帶員役止許押
解催攢不許私設關津肆行攘奪內官馬堂種種疊確
公以落地之稅不敢議減如蘆溝橋胡良橋山海居庸
喜潘等處過稅所當議豁通灣店租不敢議減如海子
西南紅門買家沽新河豐臺等處過稅所當議豁銀魚
廠初設寶坻隆慶年間奏歸光祿估買未聞差官坐採
卽採鮮享獻原與葷課鹽租無干坐派地方原與青廠
天津等處無干今攔河豎旗水陸並抽此馬堂虐萬民

以欺皇上也又曰落地稅有窮極之不得不議者慶都新安二邑是也過稅有重疊不得不議者紫荆白石沿河單家橋李道口雄縣是也兩監稅有原題不載而額外私征者馬堂則收長蘆鹽租梁頭水脚等項張業則重收小直沽宛春征引租是也順天地方已屬張業今張徵之於河東馬又徵之於河西張徵之於河南馬又徵之於河北及問其奉何明旨祇漫應之魚羣銀二萬兩只混言總數不言何處徵多何處徵少原欽依丁家沽者除作廣安店稅額擅自挪移隱蔽其他可知此當歸併畫一者也時雹蝗之後大水滔天京城俱沼奏蠲

錢糧卹瘡痍詔從之秋監試順天文場病革戒其子曰
吾居官二十餘年清苦不渝初志卽歿勿使人憐而賻
我使予目不瞑也丁未三月卒年六十有六祀鄉賢公
爲人淳厚沉毅堅不可奪其奉身敝衣蔬食務黜浮靡
嘗值河決城堤將潰冠服拜禱水一夜消去其誠能動
物如此

舊志

陳如錦字闇然萬厯戊子舉鄉試家素饒有田六千餘畝
悉分弟公無取焉爲日照令政稱和平尤喜獎拔士流
所甄識如丁允元輩皆由進士居諫職錚錚一時人謂
公有知人之鑑云宰日照二年調繁汶上以能著遷應

天通判公治汝時以直忤時至是左遷江西藩司昭磨
後升豐潤令所治之邑至今嘖嘖人口母卒哀毀致疾
卒年六十有六

李哲字仲白一字叔明多髯自稱髯生萬曆十三年領鄉
薦旋舉進士因作勤學勵政箴除廬州推官明司李陪
巡權與御史等公下車謂僚屬曰古言明察之官忠信
之長是忠信爲本也且讞獄曰審具獄曰詳以明不可
造次也故雖有成輸必服念五六日至於旬時然後定
之至其廉訪官職之賢否公出其衡鑒杜一切夤緣之
弊一時守令悉稟約束故例都御史御史或共值一郡

則先謁都御史偶御史先出蒞公謁之白事久失謁都
御史夕甫入謁同事曰宜謝過公曰以政務羈耳何謝
爲署六安守公曰署雖暫亦一州利弊之所依也鋤強
扶弱不少覺僭言李侯先... 盤小... 案牘細
爲研度疑者駁之冬夏常燃燭... 不寐擢南戶部主
政當是時吏等分爲九一北銓九南五部公之懃直竟
居九公欲請養家居封公止之曰季子諸孫皆在左右
且爾兄楠在京師勉赴白下官有要散皆靖共之地也
公遵命往以仲冬病卒滁州無子封公命以季子子之
公長於詩有開元大厯之風沙隨呂公坤來永初館於

封公家公甫八歲英偉不凡呂公異之及後登賢書常謂呂公曰窮通命也利鈍時也須自立根基不隨人俯仰然後可以天下爲己任呂公推重之

黃運泰字仲昇號際雲敏悟力學萬曆壬午舉於鄉己丑成進士初授陝西鳳翔府推官讞決明允直指常令隨行遇疑獄卽令判決以卓異擢戶垣神宗中葉儲嗣未定人情危疑公慨然曰青宮爲天下根本豈可任其搖動今日之事孰大於此糾垣臺諸人合疏立諫帝震怒禍幾不測大臣方救得削籍奪嫡之謀亦寢公家居闢黃門書院延文士讀書課業其中貧乏者供膏火助資

斧厯二十五年如一日訓諸子皆有文名長子養正已未登甲科父子仕顯而不以富貴驕人泰昌立進用諫立東宮諸臣起光祿寺少卿厯太僕寺正卿戶部侍郎巡撫督餉天津光宗卽位晉戶部尙書太子太傅廕一子爲錦衣公授職力辭廕壽八十八終

曹如結字繼鵬號雲門其先世自鳳陽徙居徐州之碭山復自碭而永公生聰穎好學事親孝撫幼弟在襁褓中教誨婚娶無不周至性儉約服飾未嘗少侈弟歿姪亦幼公養視扶植與子無二中萬厯甲午鄉試戊戌進

除陝西長安令爲省會要地吏事繁劇公游刃優裕無

所滯關邑有重稅隸于大璫股削逋繫爲民苦公悉罷
其征歲以所却羨金三千兩抵之蓋厓令以法笞璫奴
致璫窘公憤爭竟日璫氣折竟毀牘邑有大憝爲關西
渠惡公廉知之密令邑丞械致榜殺之召入主武選政
未幾以直忤權要出爲蕭邑尉以病家居十餘年日與
故舊觴咏林泉間未嘗以一牘干謁守令或有公議則
侃侃正論不忌復起泗水令以疾辭歸里而歿

舊志

光緒永城縣志卷十九

人物志

仕蹟

明

王三善字尤名別號彭伯先世自杭州徙家永城公生而
穎異絕倫爲諸生以文章名試常第一萬曆癸巳選貢
復擢第一丁酉與兄三益同舉於鄉辛丑成進士授荆
州推官或告楚宗有異變公力持其寃諸獄平尤無二
縱者兩較四川山左關所取皆名士陞吏主調考功調
文選因材用人不徇權貴請假歸里再起考功郎中掌

計典丁內艱服闋補文選遷太常少卿天啟中貴州安
邦彥奢崇明等叛攻陷州郡詔命撫黔提兵赴援至鎮
遠圍已十月餘奮兵進戰達於龍里復捷於華鋪隆峒
安邦彥乃潰逸圍解公入貴陽凡家書邸報固未啟日
恐亂吾意轉戰七晝夜城卒以全安奢等謀復犯會城
公遣偏將祁繼祖王建中等破蓮花堡救青巖進勦八
姑蕩前後焚燒斬獲甚眾窮追渡河因乘勝襲擒逆黨
宋萬化執何中蔚劉法祖等獻俘京師晉兵部侍郎督
魯欽等直入大方渠寇奢崇明蔡金貴張向極等就擒
安邦彥奢社輝等焚巢逃匿會陳守愚詐降羅鬼諸苗

截戰公裹甲臨陣竟以墜馬被創死詔贈太子太保兵部尙書子祭葬謚忠烈專祠于里塑像以祀並祀鄉賢廕一子世襲錦衣衛千戶著有四書解易經辨諸集史明傳

張夏茂字子芳號六庵又號五如萬曆癸卯舉人初授保安州邊方僻苦清慎自矢士民歡頌遷真定府同知時有巨寇盤踞武強奉詔勦捕直搗賊巢賊悉平士民月祝之再遷南宗人府經歷陞南刑部員外轉郎中時大司寇蔡諱思充凡闔部疑難獻決悉憑勘定乃入奏出爲漢中府知府蒞任月餘值流寇圍城百方守禦寢食

供廢城賴安全致仕旋里累官授奉政大夫詩詞字畫
垂重鄉國所著有南莊餘詠苦海記剪寇凱音等集傳
於世年七十二卒

曹鐸字爾振號念莪萬曆丙午舉人任江南廬州府通判
正直不阿愛民如子時廬地有萑苻之奸獨廉察之緝
捕一清累帶司李政簡刑祥所至州邑廉惠懋著任廬
三載撫軍直指交章薦之以積瘁成疾終

李支揚字公遠別號滄陽萬曆三十一年鄉薦三十五年
進士爲顧公天峻所拔士除山東曹縣令曹去永僅二
百里公畫河爲域嚴杜鄉親首捐祿餉學宮課諸俊髦

各里設社學以教農民子弟之秀者王子以麟經分較
秋闈所得士爲山左六部所推服又定輸納之制嚴防
胥吏積弊盡除值歲祲人相食煮粥賑活數萬人曹距
漢陶五營密邇盜賊竊發公堅壁清野遣銳卒搗其巢
穴四境卒無患邑濱河每歲簽夫輸柳征役不支公爭
於上官募役招商民不與焉值秋霖曹邊河數十里民
皆修築河干盡廢秋成公謂河非農夫可禦下令永革
之民爲立祠以祀倣古常平倉勸民積貯五年中得穀
數萬斛饑歉不憂至三十八年入覲擢兵主晉武選郎
公以承平日久大帥皆執袴子工賁緣專賄賂武備全

衰白於大司馬欲盡遂九邊韜畧扶勇之精者而更易之督理清黃卽勲滅之胄一絕請托嘗自書其署曰俸薄儉常足官卑清自尊朝廷欲大用之曾以憂歸至濟甯州以哭父中痰卒年五十七公幼事父母以孝聞初母卒葬值寇變坐林莽中守數晝夜寇退而還歷兩繼母事之不異所生弟病醫爲灼艾公亦自灼以分痛有姪幼孤患疹公刺掌血禱祀於城隍廟願以己子代之歿祀名宦鄉賢

王三德字未凝別號尹愚又號宜蘇贈大中丞鳳溪公之季子生而岐嶷學復敦敏伯兄三極仲兄三益叔兄三

善情篤友于觀摩諸兄後先脫穎而公方應童子科學
使者三試冠軍聲名籍甚甫餼食卽從匡嶽徐先生究
心性命之學萬厯己酉登賢書癸酉成進士人方想望
經綸乃孝友性成輒念太恭人八十餘伯兄先亡仲兄
赴石樓縣任叔兄亦在考功部署無人侍養乞假歸省
及太恭人逝公一手成殮獨當大事服闋謁選得評事
雖職平反而游戲翰墨寅協倡和名勝品題有樂天東
坡之雅致考滿擢南天曹尙書郎公懸鏡盡職豪邁風
流居然仙吏嗣叔兄撫黔陣亡仲兄州牧望議骨肉傷
心又值魏璫構禍引嫌退居憂患苦哀人不知也再起

充東僉憲進少參分巡濟甯轉浙江糧儲副使遷杭嚴
右參政類皆盡職掌百廢具興辦軍需勤案牘積勞成
疾未及大用而卒著有事友堂文集醉石軒詩刻恆言
憶等書行於世

胡一龍號漢函性淵通禔躬方嚴好讀書爲詩古文辭兼
善草書萬曆壬子舉於鄉丙辰成進士授北京武學教
授遷北國子監博士陞戶部主事監視大通橋運道圯
壞公省浮費修築完固漕事迄今賴之督餉密雲清汰
虛冒得羨銀上於朝舉卓異去民感之爲建祠陞山東
督糧副使時漕政叢弊公毅然釐剔盡復其舊加銜參

政覆讞欽案劉存仁等獄秉公平反全活者二百餘人
陞秦臬不赴引年里居日惟著述自娛郡邑大夫欲望
見顏色不可得丙子春流賊至公率眾欲入城爲守禦
計途遇賊公義氣激烈揮劍躍馬逐之遂遇難

練國事字君豫別號任鴻弱冠以孝弟聞年二十二歲登
萬厯癸卯鄉薦布袍徒步授書里中丙辰成進士授沛
縣令以廉能調繁山陽天啟辛酉分校應天取士九人
而李清爲諫官有聲望治山陽三年舉江北卓異第一
擢監察御史上疏論山東天冠漸大巡撫趙彥不宜畏
避失機大學士葉向高史繼階俱以病請疏留向高輔

政而糾繼階奸邪宜罷又疏論京堂大壅不宜添設又疏請濟貴州之急以收成功又疏請定閣部孫承宗行邊事宜而廢庸撫閩鳴泰又疏論權黨魏忠賢以逼取冬衣以辱尙書鍾羽正非朝廷體又疏論丁巳之主察徐紹吉韓凌趙士諤探宮禁旨誣出諸公之賢否不公天啟四年奉詔巡漕時以治何翰草柳民困於力公致書總河論永城地遠土瘠草柳莫辨遂罷其役五年報命疏論薊遼總督王之臣被糾忝位奪情違限宜速去又疏論邊餉匱乏李起元昏眊不宜居戶部給事中趙興邦阿魏忠賢意論公爲趙南星黨人落職崇禎元年

詔起掌京畿道疏論房壯麗爲左督御史媚逆黨魏忠賢而用倪文煥掌河南道壞法亂紀爲甚明年遷太僕寺少卿督餉山西旋以僉都御史巡撫陝西時延安民饑爲亂邊士附之所在蜂起而李老柴一條龍陷中部縣公提兵圍賊城中賊將劉道江自外接應公率將士力戰却之賊窘急開城出戰又大破之斬首一千七百餘級擒李老柴一條龍獻俘京師又進兵殲可天飛於鐵角城而用間使雷起春等誅郝臨庵獨行狼二賊首並擒斬大小賊百六十餘人前後斬賊萬餘級復進兵擊之賊殆盡陝西平七年晉寇逸入陝西總督陳奇瑜

爲賊給以招撫檄止各道兵公接驛書大驚卽馳書論
不宜弛備疏陳輕撫之害奇瑜深怨公已而賊果復潰
兵部尙書張翼鳳力徇奇瑜以其罪坐公謫戍廣西被
逮日秦民追送號哭車不得進陝西人季遇知等合疏
代辨溫體仁主之不省十五年遇知爲吏部尙書特疏
鳴冤有云原任陝西巡撫練國事偉識遠猷冰心敏手
曩撫臣鄉立意以勦賊爲主與督臣陳奇瑜意見相左
被參得罪實非其辜詔復冠帶乙酉三月卒年六十四
公爲人簡厚有度守道剛正詩文豁達有奇氣倉卒遇
戰陣不爲搖折家居時逆鎮劉超殺魏景琦等鼓譟至

公家公正色曰庶民仇怨殺人罪及身耳將軍國之大帥奈何冒反跡爲族滅計超氣折卒授計成擒永城全者數千家論者比之韓愈服王庭湊云公仕三十年家奴不足百指田園僅供饘粥解官歸始購宅以居沒之日朝野無不痛惜淮浦及秦人猶誦其政績不忘著有詩文集福王時召爲戶部左侍郎加尙書見明史

張天瑞字子亨號鳳池鎧之子也萬曆辛丑貢士任扶溝縣訓導陞開封教授制行端方年九十一猶如少年著有七十二賢人物考勲戚祖訓箴屢爲鄉飲大賓

張星字東井號芝亭負經濟才年二十九舉於鄉崇禎甲

成成進士授清豐令勸民重農植桑以培養根本爲務
尤長聽斷常兼攝開州南樂兩大邑縮三級每令三邑
訟比左右並理公口訛耳聽腕判無停滯各當其情由
是御史臺直指使先後交章薦行取考選擬掖垣適朝
議輔臣薛公公會試出薛門下因累及公遂罷歸里居
結詩社蒔花竹著葩經講意菽草等集及闖寇之變宏
光起公爲光祿寺丞晉太常少卿公知時不可爲辭不
就避居浙之天臺凡越山水之奇無不涉歷迨時平還
里築室於第東四面砌玲瓏怪石中建小舍號曰石龕
一絕意仕進吟嘯其中作雲山以自娛筆法有黃子久之

遺兼工繪事花鳥尤精著顏子釋一卷采入

欽定四庫全書石龕詩草邑令程公爲之鏤板吳下姚
山期評其詩品人品爲中州第一云祀鄉賢

張才善字民美號藝公崇禎癸酉舉人甲戌進士生而豪
邁秉性奇峭鬚過臍容貌偉俊有奇男子之稱早年失
怙事母如父因心友兄誦讀之外市井無聞初授行人
封藩出使皆能不辱君命祇以強項考選陞刑部福建
司主事歷陞郎中執法平允守正不阿在部七年分符
西安府時方多難竟以鞠躬盡瘁卒於官署無餘囊土
人至今思之

蕭譜元字籟始號籟太鄴城人壬子暨從弟並登賢書時稱二鳳甲戌成進士筮仕襄陵邑值兵燹大侵後路齒相望公噢咻拊循不遺餘力兼署翼城太平事三境人竹馬爭擁於道殫思經畫興利除害如水砦驛遞諸事至今猶食其利丙子己卯兩較棘闈先後得士十人登甲者六居官絕苞苴鋤無所避以忤時遷佐蘇州守幕署吳篆推誠惠愛一如在三晉時癸未遷韓城下車甫踰月闖寇入關藩城陷率士民登陴固守特勅褒之比於二十四郡之平原焉已而軍覆援絕奔江南

王師渡江入金陵授公江甯教授固辭不獲始就職雖烽

火之餘絃誦不輟署篆溧水遷國子監博士以疾不起卒於京邸公側室張氏聞計不食公柩至閉戶自縊以

殉

舊志

李支振字公麟一字麟生治春秋弱冠郡守鄭公三俊修文正講院課士於中每邑拔其尤者館餐之刊雪臺會草九屬凡五十餘人公則所擢士也崇禎三年秋試邑令賀公鼎入闈分校麟經例應六人適得七賀公曰七卷中有李君吾當任天以去之及填榜去者卽公賀公惜之公一不介於中閉戶讀書日與諸友以理學自勉所著近思錄正心者八修身者七訓人者九與朱紫陽

濂洛關三大賢近思錄並垂不朽廟堂知其賢以賢良
方正辟至京途次著北土小紀備一時兵戈流離狀欲
效鄭俠之圖以聞與諸生約曰周之士貴自貴之也秦
之士賤自賤之也范文正公秀才時以天下爲己任吾
輩烏可不自貴乎遂著盟心十二要雖郡中宋莊敏公
著居官藥石不是過也筮仕華陰令公一如所爲盟心
者行之會兵戈旁午徵馬徵餉皆自辨不擾民力河壅
濬其故道歲六蝗禱於神蝗出境後以事忤上官意遂
掛冠去惟以近思二十四則課子弟不預外事十五年
流寇陷郡公攜妻子併生平詩文數十卷避於河北之

豐邑兵亂破豐公殉難

舊志

景琦字二韓號方齋孝友性成爲秀才時以天下爲己任己卯舉於鄉庚辰成進士是時懷宗銳意圖治不次用人公以對策稱意遂授廣東道御史巡視西城輦轂肅清有神明之譽抗疏彈宰相不稱職時已差巡按蘇松輔臣啣恨以決囚中傷回籍居里時值闖賊寇中州公念永城係江淮門戶且鳳泗陵寢所關遂倡義舉與士民誓守孤城總兵劉超有逆志招致蕭宿土寇爲亂忌公掣制壬午閏十一月朔日率城張獻策穆國用等入公第公時盥漱出不意罵未絕口遂遇害是時公祖

宏遠鄉飲公父履祥恩榮公弟景襄長子維燦俱被害
母蔣氏抱孫女投宅後水中死側室洪氏自縊死乳媪
藏匿其八歲子維平逃今猶有後祀鄉賢

丁魁楚字中翹號光三崇祀鄉賢懋績之子也萬曆壬子
舉人丙辰進士授戶部主事陞郎中授大名道副使勤
撫字恤疾苦大名俗尙徇馬公以敦本教之俗盡革擢
山東按察使決疑獄洗冤囚民多感之崇禎四年擢巡
撫保定七年擢兵部侍郎代傅宗龍總督薊遼保定軍
務九年七月畿輔兵變被代歸里值逆鎮劉超讐殺魏
景琦孝廉喬明楷據城以畔持刀至公家公曰若乃國

之大帥何欲自滅其門耶超求救公曰若乃凌逼太甚
事不得已吾與練司馬爲若申雪耳超叩謝去時城中
紳士得保全公之力也巡撫王漢奉命討超爲亂軍所
害超勢大振會馬士英督兵公及練公密商馬公設計
擒超亂平起總督河南湖廣加兵部尙書福王立召總
督兩廣唐王立於福州命以本官協理戎政靖江王亨
嘉反下梧州執巡撫瞿式耜公檄參將陳邦傳等討之
獲於桂林封平粵伯仍留鎮兩廣洪承疇舉兵南下以
同年友修書招之公答書拒之慷慨悲烈正義凜然後
與瞿式耜何騰蛟擁立桂王於肇慶進東閣大學士兼

理戎政

王師下廣州奉桂王走梧州復走岑溪爲李成棟所殺或云戰死藤江餘見明史

丁啟睿字性如號聖臨平粵伯魁楚從子也萬曆戊午舉人已未進士授南京兵部主事陞郎中授太原知府歷山東按察使右參政坐事謫陝西副使九年甯夏兵變公斬殺巡撫王楫者首惡六人軍中大定再遷右布政分守河南從巡撫孫傳庭討賊拜右僉都御史代孫公撫陝西陝旱民益爲盜十三年用督師楊嗣昌薦擢兵部右侍郎代鄭崇儉總督陝西三邊軍務討賊嗣昌死

加兵部尙書改加督師湖廣河南四川及江南北諸軍
仍節制三邊軍務賜劔勅印時李自成圍開封衆七十
萬公催傅宗龍討之十二月自成再圍開封河南巡撫

高名衡飛檄至公率總兵陳永福討之射李自成中其
左目圍解明年四月自成復攻開封公集左良玉虎大
威方國安諸軍偕保定總督楊文岳進戰良玉曰賊鋒
銳未可擊也公曰圍已急必擊之良玉不聽走九月賊
決馬家口河灌開封大梁陷乃詔褫職候代久之歸福
王立召督河南勸農勦寇諸務尋以擒斬歸德僞官拜
兵部尙書加太子太保官其一子餘見明史本傳

韓淑琦字艾愚號譽溪治易崇禎己卯科舉人庚辰會副
任陝西興平縣知縣丁艱還里兩袖清風士庶立碑頌
德作十賢歌以誌之年七十八歲終於家

舊志

秦禮以吏員補義烏典史明習法律縣有疑獄必取決焉
六年歸休村居課藝凡鄉飲公讌有司禮請屢辭不豫
卒年八十七

趙勉以吏員任六安州稅課局大使清慎供職自奉儉約
餘俸惟以購書遺子六年歸休卒

王鵬以吏員任巡檢勤勞廉介每爲當道所推歸休後與
鄉鄰處恂恂然無賢不肖皆禮重之

呂杼字伯一號枚臣少有名庠序事父左右奉養不懈恂弟治巢邑令政聲洋溢承孝友之家風敦型于之雅化至不倦仕訓導終弟子守其學子孫守法

徐一體以吏員補陝西洋縣典史廉勤稱職

徐應孔以吏員補山西襄陵典史時襄陵多盜應孔嚴清保甲地方安靜撫按交章薦之曰花封蓮幕贊輔名高以母老終養歸

劉源居城北劉老家幼聰敏丰神秀異礪礪安舒承祖彥忠父瑄之訓勵志爲學貢成均爲燕都掾吏勤慎供職成化壬寅升授潞州府同知未任而沒

舊志



光緒永城縣志卷二十

人物志

仕蹟

國朝

傅長祺字爾義號慎和其先世業儒自王父下及伯仲皆爲博學弟子員公於倫次爲季幼而孤天性孝友好讀書一燈丙夜寒暑不輟舉丙子鄉試順治丁亥捷南宮授戶部主事權關蕪湖征商所入取足供額而已報代之日行李蕭然人皆敬異之視稅河西晉僧叢弊公力消除之而宿蠹以清由是勞瘁構疾予告歸就醫浙西

歿於錢塘公歸里時閉門謝客日披緇禪誦有以田宅

乞售者公笑曰何故使吾兒多書一券卒不置

舊志

李廕昂字嵐如別號莢居賦質汎敏年十六入庠順治丙
戌成進士授山東道御史公侃侃正言如重計典禮隱
逸諸疏當時以爲碩畫丁亥巡按廬鳳等郡流寇遺孽
踞六安拒官軍公諭以德威遂投誠廬鳳之民得免兵
革者公之力也報

命後督學蘇松常鎮淮陽六郡崇古學正文體擢拔寒俊
如繆彤徐乾學葉方藹翁叔元朱錦黃仍緒汪琬張鵬
曹禾蔣中和公皆拔之俱以名顯然江左多顯官竟以

杜請托忤當軸左遷公由是志在林壑不復求仕構小
圃栽花蒔竹思樂林泉間遇地方大事義所當爲者輒
勇於擔當向當道力爭之國初驛道未分皇華之使多
迂道太邱民不堪命公言於撫軍賈公疏改東路驛得
以減順治十六年霪雨不止歲大饑捐穀六百石以濟
貧民全活甚衆康熙四年河決東注與護城堤等公率
衆堵塞立河干三晝夜不休水勢以殺是時城土薄不
足禦冲決公不惜重價收民間破衣包土而塞隘焉邑
人德之至於養流離之幼女撫昆弟之孤兒病者贈以
藥餌沒者營其葬具待公舉火者若干家待公經營婚

嫁者若干家稱貸而不取償者皆是也其好行其德多

如此

舊志

丁啟相字山來號勵仲晚號山翁賦性通敏讀書一覽數

行九歲失怙學書於王覺斯師事張訥訥名士也嘗覽

其文嘆以爲不可及既而屢試於督學皆名在訥前郡

宿侯朝宗中原復社宗也見其文重之嘗會郡知名士

二十人結社於百泉皆卽席賦詩贈公有云未知張緒

渾飛似虛負風流二十年庚子舉鄉試甲辰提南宮授

沔縣令沔界秦蜀視事未幾值逆藩變孤城援絕陷賊

中七年會副使王懷民齎密

勅招致被陷文武公遂結原任貴撫曹申吉圖內應謀洩
逆藩執申吉公與懷民間道奔軍前督撫提鎮合疏奏
保謂公忠義自矢陰謀內應可謂始終一節生死不變
者矣因得復官陞四川忠州堅辭不復仕歸里建書院
延名師聚英俊而教育之置義田五百畝以供膏火笑
傲林泉者十年工書法爲一郡之最庚午六月卒年六
十一邑侯淮山周公額其堂曰踵華有序志其事

周侯曰太邱丁王呂李望族也科第蟬聯尤推丁氏
篤生勵翁先生聿修厥德同弟聖瑞元甫於先人讀
書處重立書院聚族黨英俊而教之風雨晦明不少
懈置義田五百畝以供膏火亦近今之罕見者余叨
任茲土每愧作人之化多所未逮喜勵翁好
學法祖無忝古人因襲之以志不朽云舊志

黃養冲字玉章號浩源性至孝博學能文章有經濟才關
黃門書院於邑東與兄養正約同邑文士習業其中成
就頗多聲譽滿梁宋間逆鎮劉超據城叛鳳督馬士英
奉命討之公與練國事贊畫潛誘歸降順治四年膺歲
薦授陝州訓導人有爲公惜者曰經濟大才何屈首苜
蓿盤中公曰蘇湖學規傳美千古古人隨分盡職吾不
敢以冷官薄之莅任與諸生定條約每鄉立文社崇尚
實學期返浮靡一歸純粹行之期年士風丕變陝六十
年無登科者是年鄉薦有人士林頌焉

舊志

趙秉謙字六吉康熙壬子拔貢親病躬侍湯藥衣不解帶

及歿哀毀骨立歲荒鄰里多持田券易粟秉謙給粟還
其券人皆德之任國城縣訓導修文廟置學田勸月課
士風丕變以子士驥貴贈吏部稽勲司郎中卒祀鄉賢
胡世調字梅九號梅菴去氛長子歲貢生初選江西銘山
知縣丁父憂未之任後選四川筠連知縣在任八年勤
政愛民地連蠻夷百姓被虜者捐俸贖回以贍養之去
之日民建祠礮石誌其政歸里修譜系置義學舉鄉飲
大賓

呂振字仞千號勉菴式尙之次子生而穎異弱冠以文章
名順治丁酉舉於鄉辛丑舉禮闈康熙甲辰殿試成進

士三仕邑令而後入諫垣大抵寬以居心慈以撫衆

方亮直以勵廉隅故所至政績顯著初蒞巢縣值吳逆

弄兵王師雲集芻蕘之供挽輸不絕兵雖數擾民不知

苦行一條鞭法民立碑頌之巢民嫁女甚費富者益溺

女公諭之曰父子天性也何爲此殘忍事婚嫁稱家有

無溺女者重坐之治巢數年政聲達遠邇丁艱歸泣送

者數千人起服授山東平山令時大旱流孳徧野公請

於中丞于公緩催科開賑濟民因大蘇于公薦於朝而

公丁外艱去三年後再授朝城尤稱難治民強好鬪公

抑豪強旌善長明教化習俗日移士民漸臻禮義邑人

咸稱神君中丞佛公以公才能薦行取陞戶科給事
中入都時父老懷思不置遂肖公之貌而祠之公在戶
垣首上禁訟獄株連婦女之疏又請嚴禁州縣虧空之
法

嘉納之他如盜案寬處分之條錢糧定按季征收之例
黃運兩河不時衝決河員每歲虛糜百萬因劾其曠官
狀均如所請丙子科充江南副考官陞工科掌印給事
中署工部侍郎事康熙庚辰夏患病請告賞假歸里年
六十七八月卒存有奏議若干卷公爲政恪守新吾司
寇公遺訓凡呻吟語實政錄去偽齋集皆手讐校刊自

爲諸生卽留心經濟官諫垣時詔九卿科道各舉所知
公舉涿州牧余成龍知縣金人望等尤長於文詞嘗曰
歐陽公喜與人言政事不及文章謂文章但能潤身政
事乃能潤物後之君子旣膺民社簿書錢穀分營已久
文章一道棄之如遺一旦昇以文衡能燎然於心目間
者幾希丙子科典試江南取中多知名士而三等伯太
傅張文和公廷玉相業文章尤昭著寰區人服公藻鑒
不爽云祀朝城名宦鄉賢祠子三長先醮候選州同知
次先陟舉人官知縣三先勛光祿寺典簿

李天馥字湘北號容齋先世合肥人入籍永城少穎異稱

神童順治丁酉舉人戊戌成進士選庶吉士入館後益閱覽四庫書散館授檢討丁父憂服闋補故官康熙十一年遷司業進侍講充日講起居注歷少詹擢閣學充經筵講官在

上前必直陳無隱會雨澤愆期

特命三法司詳鞠公皆減等發落擢戶部左侍郎有以苞直謁者公拒之曰吾一日在部無望茲事之行也吏皆斂迹調吏部尤以揚清激濁爲已任五年一無所私上自是器公擢工部尙書時

上召總河靳輔巡撫于成龍面詢河工事宜靳輔以高家

堰宜築重堤截水宜出清于成龍以修下河開海口爲急二人各執一說

上命九卿會議公建議下河海口宜開高家堰重堤宜停上從之調刑部轉兵吏二部時大學士開缺

上諭閣臣曰機務重任必不可用喜事之人李天馥老成清慎學行俱優朕知其決不生事遂拜武英殿大學士
明年丁母憂歸

御書貞松二字賜之又賜書格言一幅榮其行出都後

上曰李天馥侍朕三十年未嘗有失三年易過此官不必補人三十四年

召還仍入闕視事公感知遇之深益退然若不自勝嘗曰
欲變法不如守法欲救弊未必無弊奉行成憲不失尺
寸此乃所以報也年六十五薨於位

特謚文定公性至孝執親喪毀甚扶母柩歸嘗取道巢湖
時冬寒水涸舟至水湧數尺如送喪者既葬廬墓側手
植松楸淚血沾漬忽有雙白燕棲其廬人以爲孝行所
感遂名所居曰白燕廬歲旱公爲壇乞禱天大雨秋旱
蝗公禱如前蝗盡去公在位尤留意人才

詔徵博學鴻詞公舉李因篤顧炎武秦松齡等行取科道
公舉陸隴其邵嗣堯彭鵬等世稱有人倫鑒知縣李方

廣坐法孝子爲父報仇及縣令負官錢者皆請赦之初
入翰林雅以詩文爲已任與王漁洋葉方藹陳廷敬諸
公倡復古學每朝罷讌集如林下人而望其風神局度
春容大雅皆書卷所積也著有容齋集子二長字青官

編修次字蒼舉人官內閣中書

國史

王連瑛字廉夫號西莊前崇禎癸酉舉人道普之子順治
辛卯舉人康熙甲辰進士家居十一年選直隸安肅知
縣性廉慎多建白下車勸農桑修縣志值旱督民穿井
八百圓齋宿乞禱雨大降有勸民穿井歌植桑歌士庶
頌之三年報最薦卓異行取禮科給事中上言定修明

史之例裁屯衛各疏次年三月又請廣會額正文體掌
會試同考官轉禮科掌印給事中丁卯典福建鄉試因
問策題忤時相明珠被議鑄級調用士林寃之次年告
假旋里晚居西莊詩書自怡工書法臨蘭亭帖及聖教
序各千本土林爭寶之有遺安堂詩文集子二長禔歲
貢次祁拔貢孫復臣青州同知青臣舉人內閣中書

丁易字雙九號學田母劉氏苦節自誓遺腹生公以日月
正長取名爲易家素貧太夫人自力衣食上事下教不
遺餘力又命易與王給諫交故學日進康熙乙卯舉於
鄉己未成進士授內閣中書舍人出仕江甯府同知勤

慎供職充同考官取中多知名士內陞工部屯田司郎
中擢廣東高廉道副使正己率物愷悌宜民子湏官雲
南黑鹽井提舉

趙士驥字冀北號瞿庵鄆城司訓秉謙子也康熙壬戌進
士授江南臨淮知縣勤政愛民以卓異薦爲吏部員外
郎陞郎中癸酉充北直同考官擢江西吉安府知府修
白鷺書院教以文法士多入詞林瀕江多盜藪行保甲
法嚴懲之商民以安以老歸所存有瞿庵治譜

成明瑞字貞開監貢生順治十六年仕湖廣沅江知縣清
白自持實心撫字日坐公堂訟來立判獄無冤民邑之

西山及濱湖蘆洲向爲盜藪設計緝禽勸諭化導皆歸
善良修書院學宮道路廟宇百廢俱舉在沅十二年卒
柩歸之日鄉紳士庶泣送者數千人立碑誌遺愛

李昌祖字勺文號鍾邵六歲就外傅讀孝經不忍釋手九
歲通五經能屬文年十七補博士弟子員潛心載籍博
求古今治亂興衰之故發於文詞康熙丁巳登賢書九
上春官不第家居養親不離左右親沒後筮仕山東萊
陽令初至卽值歲饑捐賑濟之修學校平獄訟崇廉節
一切病民者悉蠲去有宦者以事責婢婢自戕婢父誣
控之某懷千金獻公曰今知有法爾如無罪何以金爲

廉得其實竟免其罪文登奸民王三爲暴登萊騷動公
設計擒之兩境以安三年治成上官擬列薦劄而公以
勞瘁卒於官士民惜之所著有實勝齋詩東海雜詠彭
方洲閣學爲之敘

李汝霖字雨蒼號歛菴晚號山骨老人十歲失怙兄文學
汝寅愛而教之與季弟汝懋同學攻苦兄弟自相師友
康熙丙子以易經中亞魁與弟季平同榜號爲李氏二
難己丑成進士家居十年選授鄱陽令時年已六十餘
矣而精力甚強勇於任事愛民如子代爲完逋賦者二
千緡設社倉百餘所號爲李公倉丙午以卓異入覲

上異其能以知府發福建補用初任興化再調延平又徙建甯以廉勤督僚屬以德行化士庶委赴蘇州辦銅入覲

特旨授刑部郎中公身長八尺飲酒數斛性剛直無所唯阿友人方靈舉屢規之年近古稀引疾歸益發篋書手自編錄合前後十年所集文既定之名曰古文統以名過大更曰求是齋文衡別著經正堂求是說十卷制義若干卷藏於家公博極羣書善古文與方靈舉互相商確制義亦深詣精妙雖徐思曠熊鍾陵不過是也爲人坦易羈落篤於孝友張清恪公亟稱之清恪集多其校

訂卒年九十五錢塘陳太史兆嵩爲之傳子愷進士官
貴州糧驛道

李汝懋字季平號畏蒼少受兄汝寅教康熙丙子兄弟同
舉鄉闈壬辰科進士任內閣中書轉宗人府主事陞吏
部員外郎平生孝友好古文與兄兩蒼同輯古文統各
抒所見士林服其卓識

昌先陟字湖伊號惕齋給事中振之次子也少嗜學於經
書朱黃鈎貫均得條要爲文宗法金陳字摹趙松雪因
父官京師入監讀書康熙己卯中順天副榜甲午登本
省賢書益淬礪於學屢試不第雍正癸卯截取簡發湖

南授辰谿知縣苗猺雜處素稱難治君下車卽以釐奸剔弊鋤強扶弱爲已任有民婦被姑虐忿而投崖挂藤蔓中樵夫救之偪令成婚婦告之官君傳其姑勸諭之遂和好如初又有強暴掠苗女事發甲長鳴於官君詢所自來言語侏儻乃寄食民家得其原處歸之苗民感涕俗尙健訟童子入塾卽以刀筆爲業君於四鄉設鄉學數十處遍張條約以崇正學有學詞訟者以父師是懲其風頓革文教日興念母氏春秋高踰阻洞庭不克迎養日捧檄以爲親也導輿以奉母也而我不能何戀此升斗爲哉力請終養制府李公成龍素知公賢挽留

不得買舟歸紳士耆老攀轅餞送者數千人後新安呂肅高守長沙民猶誤認爲公云公居林下以桑梓之疾舌引爲己責雍正八年歲大歉公首倡施賑全活無算又輸穀二百石入普濟堂以贍孤獨鰥寡卒年七十九子枚歲貢生工詩見文苑

李魏字鶴山號素菴文學贈公汝寅第四子幼苦讀膏火不繼至燃廢紙以燭之雍正己酉拔貢以知縣簡發江左歷宰陽湖黔縣事初丹陽盜拒傷武弁陽湖境被誣者七人君廉得其狀曰此冤獄也釋之帥怒弁大噪尋獲盜讞乃平移知黔縣黔處萬山中士鮮知書長史至

率囊金以候君却之不可乃施入書院作諸生肄業費
調合肥事上使民均得其理陞和州和與合肥鄰也有
老婦抱兒當輿泣曰此活爾父之官也揮泣攀衣不忍
去和人至今傳之會無爲出竄大吏命營弁往撲過和
索賂弗許以蜚語傷之公求營葬歸廬州民感之爲建
中州李氏三賢祠三賢乃李君哲李君廕岳及公也子
三長啟心上舍生次玉章次洗心均名孝廉

李惺字存存年三十髯長挂腹號紫髯乃刑部郎中汝霖
之子少聰敏嗜學承父教雍正辛丑進士仕浙江餘姚
知縣調錢塘以文章氣節著士林賴以成就者甚衆袁

子才其尤著者也陞玉環同知温州府知府調紹興府
建講院復古學文風丕變念父刑部公年高告養侍父
二十年先意承志暇日以詩書爲樂丁艱服闋授貴州
糧驛道期年卒平生嗜學如性命以古文名世惟酷好

王安石焉

呂柱石字漢宰號苾軒工科給事中振之曾孫髫齡舉止
凝重就外傳授經日記千言由例貢生仕貴州布經歷
署歸化安平桐梓等知縣所至有聲陞獨山州知州苗
裔逼處素號難治公教以禮義習俗日移丁內艱歸苗
人泣送者盈於路服除選授四川布經歷署保甯府同

知時值金川之亂公辦理儲侍籌備無遺經畧勒威勤
公保薦軍功議敘甲子董觀橋戴美門兩制府卓異擢
貴州開州知州抵任後嚴賞罰明信義創建書院俾多
士肄業其中又慮苗民難化作開陽教化歌以教之開
民播其歌爲倡號曰呂公歌公餘下鄉勸農野老懽然
若不知其爲州牧也一日方自鄉入城忽衙側回祿急
往救風逼官署公跪火光中禱曰法堂者天子之法堂
也倉庫者天子之倉庫也市廛一草一木民命攸關皆
天子所軫念者也有妄取小民一錢干罪已身神忍
俱任其灰燼乎遂返風滅火人皆爲至誠所感云謂畧

貴陽府嘆曰吾入資爲郎仕至郡守其願足矣乃告病歸公性豪邁仕不廢學惟恪守呂司寇呻吟語實政錄諸書不離左右猶子雯官壽陽時虜公款公慨然代償之同僚如王貽芬宋聖臣汪英耀王見龍查碩等或因公挂誤或貧不能歸公傾囊相助同人多義之

丁佃字恂若號紉蘭少攻苦力學日夜研求幾二十年爲文高深圖熟冠時賢乾隆甲午舉人乙未進士授浙江樂清縣以廉勤自持專以德化民不事嚴酷士民樂之樂清素多海寇以才幹不足去官回里清風兩袖其貧苦有人所不堪者

丁健字亦純號萃廬樂清令備之季弟幼與兄互爲師友
聞有名賢千里訪之爲文以啟貞爲宗乾隆庚子舉於
鄉三上春官不第揀發安徽授甯國令調望江桐城等
縣所至以謹愼愛民培養士林爲先務署廬州府同知
尤工書雄邁勁學擬山園帖冠絕一時

李洗心字繼甫號勉亭幼穎異爲文雄偉有奇氣乾隆丙
子與兄玉章舉於鄉四上公車不第丙戌大挑簽分江
西署崇仁縣事百廢俱興大府器之擢大邑丁丙艱歸
服除攝吉水宜春新建等縣理積案懲頑民捐俸修聖
廟書院政績著於台山岐水間徙治廬陵調南昌首邑

報最遷九江同知君於政事餘閒偕郡俊彥泛濫浦登
匡廬遍覽名勝賦詩作文見者謂有白太傅風作甄拔
士如南昌彭志醇許庭芬庭椿廬陵盧鼎臣蕭以均皆
聞風而請業焉解組歸河督稽公瑛贈以薄宦憐司馬
清貧憶故人之句可以想其梗概矣年八十終於家平
生著作甚多袁簡齋贈序勸梓而君終不自信惟同玉
章刊制藝名曰二爽齋云

李玉章字簡亭鶴山先生之子也少聰敏爲文清空流利
乾隆丙子與弟洗心同舉於鄉縣令表其門閭曰雙鳳
齊鳴三上春闈不第大挑二等授襄城縣教諭訓士詩

明以薦陞廣東儋州知州儋處海島中蒞任後以振興
文教爲先士習丕變權瓊州知府潔已率屬以地處海
表思歸致仕與弟相倡和訂證詩文有集若干卷

劉廷詔字虞卿號半村祖居城南鄭橋生而沈實不好戲
弄性質頗鈍凡讀書皆手抄默誦久之穎悟頓開道光
辛巳入邑庠踰年食餼讀朱子語錄恍然悟曰吾所學
乃詞章耳遂束時文求小學近思錄及諸儒語錄積年
不厭秋闈屢薦不售仕考城教諭以讀書勵品課士丁
嗣父艱歸服闋授孟津教諭當咸豐初流寇忽至人情
洶湧罕有守志公號招守備無一至者公冠服入文廟

俟命而寇從城外過仍誦讀如故凡先儒講學家言及一切陽儒陰釋之學無不推究其理而辨其指歸十三經近思錄三魚堂文集皆手抄數過反覆潛玩朝夕披讀不稍輟學問恪守程朱力辨陸王著理學宗傳辨正一書倭文端公吳竹如侍郎亟稱之校定刊行傳於世又著半村制藝讀經隨筆皆純古簡老可傳亂後無存光緒九年呂觀察呈請入

國史儒林傳弟廷誥族孫國輔弟子賀清澗傳其學

劉廷諤字介臣生而聰異爲文操筆立成與其兄廷詔互爲師友廷詔之文簡古高超以大家爲宗廷諤之文渾

瀨流轉以才氣勝各極所長由增生屢薦不售仕雲南
永善縣知縣釋寃獄清詞訟興學校革浮派士民護之
循聲爲滇南第一除鎮雄州牧廉正愛民不名一錢嘗
順甯府知府後以父憂卒於官州人爲立祠表遺愛焉
子仲懷官雲南黑鹽井提舉南關同知

丁彥儔字範亭號角垞少失怙母氏郝苦節自誓教之成
立性磊落聰穎爲文以大家爲宗道光戊子舉於鄉已
丑聯捷進士選庶吉士散館改工部主事陞員外郎調
戶部員外郎留心經濟之學在京十年與倭良峰相國
李文園尙書閔丹初相國相友善平生抗爽尙氣節見

義勇爲眾方以大用期之以病卒於京邸

董敬宣字幼平少有聲庠序郡守胡公器之道光己酉舉於鄉咸豐初皖北捻匪初起首先舉行團練法修砦保以堅壁清野鄉里效之丙戌春袁端敏公甲三調赴軍營督勇搗雉河集賊巢保同知隨同毛文達昶熙幫辦團練保陞知府同治壬戌據發江西授建昌知府下車修書院增膏火士風丕變修先儒夏良勝祠表揚南城聶孝子卓著循聲尤念建昌爲東南門戶屢經越匪竄擾乃加炮台增城郭行保甲法率團練克復新城保道員後以蜚語歸子法中歲貢生候補通判

曰霽字雨田號時庵開州知州柱石之子爲諸生肄業太
邱書院文冠多士仕江蘇溧陽縣丞佐令清漕千餘石
不染一指有廉名遷元和崇明寶山攝邑令嚴保甲練
民壯獲巨盜莊午可等多名民賴以安大吏陳方伯稱
英偉焉積功奉

旨以知縣用解餉入京請假歸里修書院士林稱頌創建
家祠置祭田以睦族人事畢回吳權震澤縣丞擒海盜
數十水西肅靜商旅共歌德政旋以病告未及歸卒於
蘇廬囊無餘金大吏弔而憐之曰真廉吏也爲請增廩
俸護喪歸子六人屢泰候選縣丞履晉典史

劉自願字鎮東以勇目數討土匪有功濬帶團練咸豐四
年以前屢經兵燹人無固志五年邑侯劉公同議守城
六年張樂行大舉圍城圍二十六日君嚴守禦賊於東門
外築炮臺高與城齊懸巨炮轟城彈從空落所當粉碎
實爲危殆君乘雪夜率死十餘人下城焚塌炮臺擒
賊而歸賊又爲諾四百餘員以便登城君遣人燈之又
預爲鐵爪來賊細取之賊許以嘉城賴以克全君之力
也後防汝甯府身經數十戰游羅副將歲卒身爲犧牲
以請甘霖立應平生恂恂如儒者好文史能畫饒強等
惜未竟其用

張雯生字雨文幼聰悟爲文法先正德行黃茂均仕

教諭課士以德行俸滿擢武平知縣愛民如子深洽慈
屋獄訟平允百姓祝之

王僧鎬字逸齋少讀書饒幹濟才監生仕福建縣倭擒海
寇數十人廈門獲安上官奇其才檄赴台灣撫苗民乃
徧歷島嶼深箐田淡水基隆等處厚賞需施條教雖侏
僂之民無不悅服焉一夜宿荒驛海盜數十驟劫旅店
婦孺哀救曰此吾青天太公也幸勿傷盜亦德之差竣
奉

音擢知縣權彰化君嚴保甲清海舶境內安堵調補同安

與教化設義塾務使異域頑蒙均沐

皇朝恩澤士民有父母之頌蒞官三十年不名一錢惜未
大用以老致仕不取海外一物歸子孫蕭條不愧廉吏
焉

李映桃字灼園少爲諸生文筆清俊嘉慶庚午與於鄉大
挑一等分發山東初權壽張知縣四鄉設義塾暇日親
蒞考課以培士習詞訟到官隨俗勸諭不杖一人擢高
唐州地當孔道應接不暇君冰蘖自持上下悅服調濟
甯興教化敦實行減訟獄終日課士如老書生然士以
伏鄭敬之年七十以老

呂遐繹字孝雍號豫峯扉青京卿次子也生而穎異垂髫授經一日完禹貢不遺一字爲文沈雄典麗年十四充博士弟子員次年食餼馮宗師文蔚特器之書應須飽經術爲爾惜居諸楹聯以贈光緒戊子舉優貢華宗師金壽評其卷曰文字冠塲 朝考以知縣用壬辰潘司農祖蔭以書法榜於都門爲後進式辛卯舉於鄉吳主考同甲推文字爲通榜冠三次北上不第值甲午朝鮮之變籤分浙江初委赴豫採辦軍硝價廉運速藏事回浙摧曹娥江釐務將羨餘提充兵餉上臺保薦奉

旨賞戴花翎權擢麗水令麗地連閩海土瘠民貧蒞任崇

學剔弊除莠安良民有白面包公之稱戶書淨征復整
免四千緡永立爲法書院久廢舉行月課擇士之品行
卓犖者優餼之而麗百年無中式者邑本處州附郭上
應少微之宿於城峻處建景星樓癸卯科舉孝廉者二
人文風大振期年政平訟理時洋務交涉殫心教案各
持其平西人翕服境內穀秀雙歧花木菓蓂咸生並蒂
連理趙太守時熙給括蒼五異圖以紀之在任二載上
憲擬大用忽患心虛氣弱之症卒於官衆僉嘆其長才
未竟身後蕭條無異寒士虧累甚鉅趙太守代償五千
金諸昆仲典業彌補之著亦囂囂齋詩文集

聶大敏薛家湖庠生性慷慨好義咸豐二年春土匪作亂
隨同陳太守平之粵匪破金陵邑中呂紳首倡團練舉
大敏爲北方團首乃力任之練鄉勇以保鄰里六年正
月十三日張樂刑等率衆萬餘圍縣城劉侯屢次飛稟
請兵求救各大憲置若罔聞城中居民羅雀掘鼠食之
困苦已極大敏憤然約其族鄰聶君聘傳登傳觀占易
等飛檄北山前後侯樓洪樓諸處一時忠義之士聞風
響應如邵寶三侯永亮貢生周鳳鳴洪一波生員左宜
之周敦趙太李印月徐紹唐童生張桂一呂永貞等二
萬餘人於二月初十日赴城解圍行數里紅風大作飛

沙蔽目不見人馬大敏激厲同人曰此天助也宜速進
機不可失至戚莊曹廟安放糗糧布置丁壯三路分攻
聶君聘邵寶三聶傳觀爲前隊進攻西關侯永亮聶建
倫趙太爲中權攻東關大敏周鳳鳴周敦爲後隊由北
關接應始入大堤君聘由捷徑入賊驚覺率衆迎敵未
及成列被君聘冲散三里道口廟內羣賊齊出時李貫
甲至兩路夾擊賊大敗南奔侯端章先入東關崇法寺
之賊出戰侯來彥呂永貞聶思孟等陣亡侯永亮奮勇
進攻羣匪潰散城圍立解割首級以獻風沙相雜城中
未之敢信守俾者下城不見一匪城內始慶更生縣主

悲喜交集相爲慰勞率衆始歸十二日四觸運糧入城
甫畢賊衆又至報仇劉侯專信復令來救大敏率得勝
之勇繼至衆匪敗奔邑侯敦慰歸鄉紳勇以備不虞當
是時也大憲坐擁重兵不顧地方不顧百姓非劉邑侯
之矢志死守大敏諸君之同心解圍則永城成焦土矣
永城失則歸德不保河南半壁壞焉其後大敏興築薛
湖寨立規條保衛一方逆匪張落刑蘇全趙浩然等皆
不敢逼後與蕭邑段太史廣瀛聯團拏獲土匪李一元
與碭山唐瑞邦聯團拏斃土匪余振山身爲鄉導迎伊
都統生擒掠首李月隨富都統收復城北各寨大亂始

平保舉訓導加五品藍翎年七十三卒揆其才實有爲
國恤民之隱禦侮捍患之功信國士也存有遇變紀畧
詳記始末足資考鑒云

按永邑地處豫省東鄙孤懸於渦亳蕭碭之間匪徒
不時竊發當危急之際惟賴賢守令及本地紳耆義
士激勵守望銷患未萌厥功誠不可沒焉

光緒永城縣志卷二十一

人物志

孝友

周

朱建幼事親以孝聞親沒哀毀滅性負土成墳結廬墓側
不與妻相面三年如一日周宣帝聞之大象元年表其
門閭拜太子洗馬祀鄉賢

舊志

隋

朱昌甯建之子也有孝行母病思瓜食方四月瓜未熟昌
甯哭於瓜田瓜尋熟母食之病遂愈有司具其實以聞

開皇十三年表其門閭祀鄉賢

唐

朱仁軌字德容建之孫也有孝行喜怒不形得失不變其
事親承顏養志無違於禮及父母有疾湯藥必親嘗衣
不解帶父母沒哀毀骨立不衣錦不茹葷嘗訓其子弟
云終身讓路不枉百步終身讓畔不夫一段安可以小
事取怨於人耶仁壽二年有赤烏白鵲棲其庭樹議者
以爲至孝所致河南道觀察史趙思閔之具上其事
帝用嘉之旌表其門閭謚曰孝友先生祀鄉賢

明

洪瓚保三里民天性樸實事親能承顏順志父有疾瓚親調湯藥日夜祈天願以身代疾果愈如是者三及卒瓚號泣幾絕葬以禮不用浮屠廬墓三年知縣王廷輔喬岱牟雲以其事上聞未及報瓚卒子昇事母亦以孝聞趙大本字子中庠生邑主簿公珪之裔也因創縣治有惠政民不忍其去留籍於此天性謹慤事親以孝聞父勉與母黃氏相繼終哀土成墳結廬於側

李孟暉歸二里民天性純篤力農養親父母相繼終結廬墓側席薪枕塊不飲酒不茹葷負土種樹四時祭祀晨昏舉哀時百鳥飛集赤蛇馴遠墓側時人以爲孝所致

王憲從一里民質樸無文事父母誠孝出於天性父母疾衣不解帶湯藥親嘗父卒既葬居廬墓側大水至塚幾湮沒憲具小舟載砭砂日夜築之圍墳高丈餘水不能浸時蒲蘆翳生塚上白蓮並蒂人皆以爲誠孝所感縣尹劉公旌其門

李支承字公紹兒時卽步趨先範稍長治春秋兼毛詩力學強記父病癱遂廢業侍左右嘗湯藥代盥櫛數年如一日及卒不飲酒不茹葷三年未嘗見齒事母承顏順志終身無懈里人僉曰吾邑先賢朱仁軌孝友殆不過是辛巳公卒權厝於郊內蔬圃會勦逆帥師十餘萬四

郊墳墓發掘殆盡公墓獨無恙人謂孝之報云

郭尙廉字行潔父西庵公抱病五年公侍湯藥如一日及終哀毀骨立事繼母梁氏如生母與弟尙忠同炊雖鬢髮皓然猶推梨讓棗男女僕從至五十餘口未嘗離枋里人稱其孝義焉

徐良仕生員性純孝凡甘美之物必先奉母母性惡殺良仕卽戒殺放生承順母志母多病良仕習醫方以供藥餌母死遵遺命撫孤姪徐洋徐洗愛育若己子教訓成立士類賢之

洪東煥字昌辰邑庠生早年失怙奉孀母孝養備至時歲

元 封 縣 志
祀徭役繁興內外侮併至公調人情飭門戶不至稍墜
家聲以貽母憂事暇卽潛心向學尤嗜先正語錄服闋
補邑庠幼弟東燿方五齡公自教之並入黌序成名士
從姪崇貴父早喪撫於公恩養教訓以至成立他如洪
依洪倩等皆貧不能自立俱收養之爲之婚娶置田產
起文會堂萃族中子弟之秀者日講課之一時知名之
士如大伸進章爾熾等數十輩俱名列膠庠彬彬蔚起
年五十二卒子二長修貢生次仁大學生

劉邇源孝友性成父名子樂二十歲早夭遺源數齡母劉
氏孀居守育及源稍長恭承母訓與其妻陳氏朝夕供

養四十年如一日祖業讓與幼弟兄有遺孤教之如子
乙亥春流寇圍永邑罵賊不屈死子宗濂辛丑進士

洪聚奎字星若邑庠生母早逝偕兄弟四人連牀爨榻前
愉色承顏而與兩兄一弟耦俱無猜兄歿後撫其長兄
之孤子名正紀次兄之子名濬源耳提面命且篤於夫
婦之倫與劉醜敬愛如賓終身無間言臨終之前月預
告其子大印云當備後事汝母亦隨我而逝矣方是時
劉配無恙未幾遂病亦顧謂其子曰吾與爾父同歸及
期果同日以歿時年八十有五邑人上其事邑侯劉公
旌其門曰雙壽鶴駕學師羅旌曰德配齊眉

潞渭母秦氏身有危病渭年方垂髻乃焚香祝天割股以
進母病遂甦族閭聞其事邑侯邵公旌其門曰大有古
風給銀拾兩獎之

余貴母孫氏病劇祝天割股以進邑侯陳公給扁獎之

呂式標字玉函邑庠生性孝友視姪猶子飲食教誨罔間
纂修家譜以聯孝睦之風鄉人有犯之者輒不較爲人
排難解紛無伐辭無德色一時翕然稱爲長者萬厯末
河決永城歸德一帶郭廬幾壑率族鄰修堤有捍禦功
爲九老會詩酒宴樂子二長遵端邑庠生次喆郡增廣
生年七十七歲終祀忠義

呂式尙宇遇知別號愛逸洛陽人成化世居新安避兵寓

陵閱四世父文學鶴樓公以授徒徙永公賦性聰穎

儀凝重事兩親以孝聞昏定晨省終身無間明天啟七

年丁外艱哀毀骨立痛不欲生苦塊極側三年如一日

崇禎壬午入邑庠屬文必宗先正處事悉中矩度遭明

季亂亡必懷家志隨之母病革藥餌無靈遂焚香告天

願以身代及丁內艱哀痛如初家貧不能卽葬每昏夜

遠歸或隄風沐雨必至柩前一一陳說見聞事死如生

君子難之劉超殺魏御史李天目以幼子匿君家君慨任之平

生和藹邑侯孫公獎額其門曰孝友家風子四長持歲

貢生次振甲辰進士戶科給事中次持次擢俱國學生
公以覃恩封文林郎享壽八十六歲卒祀忠義

洪濬源邑庠生天性純篤事親以孝聞承顏順志久而不
渝父母合葬日有烏數千棲墓上

竇振燕力學孝友兄弟無間情意篤摯析箸時宅產願分
其瘠者與人無競縣尹旌其門

洪起龍字振海郡庠廩生事親以孝聞父卒時遺幼弟二
人一起法始五歲一現龍始三歲友愛甚篤教訓有方
分爨時推產讓田無吝意無德色五十後生子印椿龍
卽亡椿能成立孝友如父鄉人推重

張思禮太醫院院判賦性孝友內行醅備因母病遂棄儒業學岐黃術朝夕手進藥餌必親嘗平日事父母孝養備至懼父母年高遇名山大剎輒齋戒跪禱祈增壽算或云神印能祛邪即問關至南海茅岱華山諸嶽素帛力懇適母病諸藥無效覆以印果愈蓋其誠孝所感父母卒遺弟應箕尚幼公撫育教誨俾成立家產盡予之李楫字伯濟號見雲性仁孝自兒時侍父母側未嘗有忤色及長先意承順遇鮮脆父母未嘗不敢食弱冠苦志爲學及先人相繼去世弟槩尚在襁褓乃棄舉子業拮据經營振門望居喪泣血幾滅性伯儒野贈詩有雞骨

支床亦可哀之句遣兩女弟及爲弟婚聘甥有蚤孤家
落者爲婚嫁教訓之俾成立與弟同居五十年毫無私
意從弟如楠如哲皆以高第居顯官公獨恥矜門闕以
清節素風自高與人交無所僞飾揚善隱惡人比之王
彥方邑人曹某逋官稅以田三百畝求售公計所逋與
之焚其券以子貴封如其官時大學士同安林鈺編修
馬之騏爲之贈序傳其事祀忠義

練維精字宗虞號肖文本新淦忠貞公子甯嫡派其先避
難於永因家焉公少穎異治詩爲文行以己意初試已
入殼舞文吏易其名不與爭再試入庠父晚年喪明食

手匕箸以進病則達旦不寐莊掖共侍無間堂厠累年
居母喪值大寒零涕成冰跣足指盡裂啜者哀焉有益
入公家公不爲動卒亦獲全遇饑疫竭力賑濟賴以全
活者甚眾年六十卒祀鄉賢

趙秉和字公調號介公弱冠能文中己卯副車事親孝聞
門雍睦有陳元方風箴仕浙江蕭山令節操清白不妄
取民間一絲粒順治己亥海寇犯金陵王師進勦時造
船之令甚嚴民畏避逃山谷中公以至誠勸諭民恐爲
賢令累出赴役公亦恤之有方完辦獨先公念高堂大
年不欲組綬榮易菽水歡歸里時父年八十餘尙健公

依依膝下如孺子焉

趙宗謙先賢趙瞻之苗裔也永之碭一里民生質美秀善事父兄宗族交遊共賢之驕氣淫態莠言詖行未嘗一見辭受取予嚴辨義利毫忽不苟里社中有武斷健訟者盡心排解不憚屈己俾鄉人相好無尤晚年捐金修橋梁道路賙恤孤寡足蹟不登公堂年八十二邑侯錢公給扁旌之曰一鄉稱善

洪臺生而聰穎好讀書因母早逝父廷對義不再娶遂廢儒業力耕奉養父沒時哀慟勺水不入口者五日讀禮時構一室獨居三年未嘗見齒

楊永泰少孤事母孝自供甚薄奉親則從厚卽嘉賓至凡有餽饌必先供母乃及客篤友於撫其兄子若己子邑令劉公旌其門

洪大印邑庠生文章德行爲當時推重其事親則先意承志克諧著稱年六旬承歡膝下如成童及父母沒哀毀骨立

胡其謨父早逝事母盡孝雖處流離遇荒歲奉養一若常時弟其猷八歲患瘡疾謨灼艾分痛親爲調治後成立永不異處教子琳琛姪玠珍瓚輩式好無尤一家仁讓四世未析箸邑令錢公旌其門曰仁讓風高

徐一環礪一里民兄弟四人環居長善居室三弟皆貧父
憂之環曰田土易得弟貧貽父憂子心何安乃以其田
八百畝悉讓與弟以慰親別爲子置田其後子孫繩繩
人謂孝友之報子

丁魁河字中帶號光兩事繼母趙氏以孝聞幼貧每負粟
以奉二親天啟辛酉舉孝廉戊辰後輒不就公車謂吾
親年老吾不可以獨遠父卒勺水不入口者累日弱弟
魁俊撫之成立凡所遺田宅卽公應分者亦悉付之祀
忠義

洪修字聖詣篤於孝友事父母晨昏定省無少怠苦志讀

書歷署陽邑下邳學篆父母病湯藥親嘗沒衣毀骨立
撫幼弟仁俾成立叔卒孀母高氏孀居遺子儀方五歲
修事養不懈友從弟如同胞祀忠義

夏廣善字學至號慶餘幼聰穎好學弱冠補邑庠性至孝
明季時隨父湛白公避亂爲流寇所執有一賊提刀刃
其父廣善抱父頸大呼曰吾父子也願死一處賊怒奮
刀向之刀忽脫手飛去數步之外其柄猶搖動多時賊
相顧愕然曰汝孝子也吾不殺汝取刀入鞘父子得全
年八十六歲終其子尙綱孫九齡俱食餼邑庠

屈高邑庠生父全犯法當死高請代之繫獄二年事聞詔

宥其罪充不縣吏屆滿補堂邑典史五年始終廉告歸
家人不免饑寒

國朝

侯服孝廉繩武之長子也繩武患痰疾醫藥罔效服割股
以進公病遂愈里人合詞稱表邑令李濟給扁旌之

洪希曾倜儻仗義孝友著稱年十八父母俱亡弟希堯三
歲希孟一歲恩養備至後生業漸廣二弟俱成立有家
室曾歎曰煮豆一歌千古傷心何忍以同胞分爾我將
自置田產均分無私世高其行舉鄉飲大賓

高厚字孟醕號緘菴邑庠生事親承顏順志無違於禮後

家業爲族人所破環堵蕭然而竭力奉養甘旨未嘗少缺父母有疾日夜號泣願以身代及沒哀毀骨立三年不見齒其從姪在襁褓中父母早逝公撫之如己子朝夕教訓俾之成立名列膠庠凡田宅卽公所應得者亦悉與之

胡去氛賦性醇篤苦志讀書初試冠軍名振膠庠幼喪父事母極孝弱弟無依教訓若嚴父讓產俾其成立其孝友如此遭明末造結茅以終祀忠義

曹如麟字貞一天啟丁卯鄉薦第一崇禎癸未成進士賦性純篤喜怒不形事親孝膳必躬奉藥必親嘗復推財

讓產以友弟闔寇東下郡城失守闔邑驚怖公燭靜處
一室義命自安逆超據城爲亂其黨羽皆他邑賊露刃
加公而公不爲之少屈鄰里願以身代之曰仁人不可
傷也賊遂斂刃退及公歿兩妾辛氏王氏俱從容就義
邑人練國事爲雙烈詩以贈焉

趙儒真邑庠生學行兼優賦性純孝順志承顏色養備至
母望氏病經年餘晝夜省視幾廢寢食及故哀毀骨立
淚皆成血尋父文運病時年九十二躬奉藥餌百餘日
不離榻側焚香籲以身代父卒一慟氣絕越一日夜始
甦三年中不茹葷酒未嘗見齒鄉黨稱趙孝子年八十

三順治十八年卒

陳宏印字建廷篤於孝友負米養親偕弟宏謨務農桑重詩書擇師家課視姪猶子姪虞賓長子虞格次虞緒俱入邑庠三子一級業儒四子一統入學食餼因父教維嚴尤母李氏望氏之訓邑侯扁之曰孝友可風

劉國輔字觀陸號恕齋城南鄰橋人少聰穎讀書過目成誦爲文操筆立成父印戈道光辛巳舉人官河工通判因運漕遲悞鐫級赴雲南依從叔个臣刺史任所謀捐復旋沒於滇時國輔尙幼立志尋親值粵匪北犯不果入邑庠卽食餼從其從祖劉廷詔講性命之學避亂

州友睢之文學趙振先等學乃定復渡河受業於李文清之門又請業於倭文端公其學大進歸而誓入滇尋父徒步至湖南之武岡州道梗不得進資用乏絕痛哭於洞庭湖邊沿途乞討以歸越數年同邑呂觀察官四川之冕甯令去滇近以書約其重往且助資焉國輔復入蜀由蜀入滇時獨逆困雲南省城數次國輔結交其徒乃達得負其父骨歸並及其從祖个臣刺史夫婦雙蛻回里人稱其孝云葬後授徒爲業孜孜聖賢之學以歲貢成均光緒改元合邑公舉孝廉方正大府徵至不應守道以卒所著立誠錄恕齋詩文集增訂曹月川家

規輯畧補

陳景揚城北陳雙樓人少聰異有至性爲制藝清拔絕俗
肄業滄濱書院必月一歸家省其父母練廼堂先生深
器重之匪亂移居城內就學呂氏家塾喜隨養親之願
未幾其父卒景揚日夜號哭竟成瘋痰惟以不得見父
爲恨逢至戚密友必長跪問父所在不得乃裹糧四方
尋之家人追其後路人見其呼號狀多不忍視卒亡於
無何有之鄉哀哉

備德潤好讀書不求聞達事親曲盡孝養處家有法度內
外三十餘口恪遵教誡耕而后食織而后衣梁肉蔬酒

無取於市者樹植工作無仰於人者全家布素長者不
衣少者不敢衣也長者不食少者不敢食也男婦老幼
終歲無勃谿之聲無忤逆之色凡有慶弔必肅衣冠親
往世俗習爲苟且反笑爲迂拘也

駱實都司與周子興周於戚同間從戎數十年寒勞結滯
小腹不能便溺飲食遂廢醫者曰藥力難攻惟人頻吮
之毒盡溺可通實遂晝夜吮之興周以愈

劉餘惠性至孝母病醫藥罔效醫者曰糞味不變其病可
痊餘惠情迫遂嘗之鄰里稱歎焉

孟廣聚農家子光緒十七年其父病危廣聚嘗聞人肉可

以療病遂割股煮湯以進其父遂愈

余天俊年十五其父逝負官債四百餘千貧不能償官責之急母崔其氏父之繼室也前母子名天佑其母憐其失恃縱其逸去使天俊代之天俊怡然應官比凡二十一次死而復甦者六毫無怨言官知之免其債生二子燦焜俱食餼